

籌辦夷務始末

籌辦夷務始末卷之十一

同治元年壬戌十一月。壬子。總理各國事務恭親王等奏。
查俄國會勘西界事宜。疊據烏里雅蘇台將軍明旌等報。
稱。俄國先有頭人入界堆立鄂博。並攔阻查邊情事。迨該
國會勘大臣到塔爾巴哈台會晤。以條約內有中國常住
卡倫一語。遂即以常住卡倫為界。嗣又有伊犁匠蘇勒官
維哈勞同來會議。妄指乾隆年間勒布什邊界石碣為伊
犁將軍私立。其執持卡倫為界之說益堅。且於來文內有
若不照辦。即係廢約尋釁之語。各等因。並明瞭等繪具地
圖。內列早年邊界。並現在俄國所請卡倫為界。及各卡倫

距邊界中間之地三項。以黃紅紫三色分別註明。呈送軍機處。欽奉。

諭旨。交臣衙門再向該國公使面議等因。臣等伏查中國與洋人辦事。全靠和約為憑。若不執定條約。與之辯論分明。該洋人即得藉口於背約尋釁。檢查俄國續增和約第二條。內稱西疆尚在未定之交界。此後應順山嶺大河之流。及現在中國常住卡倫等處。及一千七百二十八年。即雍正六年。所立沙賓達巴哈之界牌。未處起。往西直至齊桑淖爾湖。自此往西南。順天山之特穆爾圖淖爾。南至浩罕邊界。為界。以上八十九字。為第二條全文。專論西疆分界事宜。

當初訂條約之時。係由俄文譯漢。字句較為糾結。今雖各
勞等堅執以中國常住卡倫為界。原係藉詞和約內有中
國常住卡倫之句。非盡鑿空撰出。然果如所言。則唐努烏
梁海等處。即當分入俄國界內。但細將此條逐字咀嚼。約
內只有及現在中國常住卡倫之文。並無統以現在中國
常住卡倫為界之文。又細譯沙賓達巴哈界牌末處起句
下。係往西而非西南。係直至而非斜行。連日執此與該國
公使巴留提克等反覆辯論。一面給與照會。並告以條約
內及中國常住卡倫之句。如將至齋桑淖爾湖。必經輝道
拉胡卡倫之類。非謂統以常住卡倫為界。若果以此為界。

則當時條約。應云西疆統以中國卡倫為界。一語已定。何必云西疆尚在未定之交界。又何必再派大臣會勘。况自界牌末處起。本應往西。而臣蘇勒官何以欲往西南。本應往西。直至齊桑洋爾湖。何以欲往西南。斜行至齊桑洋爾湖。如此逗眉駁詰。該公使等始而已變。繼而語塞。始允將原照會轉行。復據鈔出明證。等原奏。稱維哈勞等業經由塔爾巴哈台起程回國。當即復行照會俄國公使。告以前次照會。已將條約內西字直字。逐一講解。毫無疑義。並告齊桑洋爾湖西南。既有勒布什界牌。其界牌以外之喀薩克。布魯特。臣服中國有年。自應仍前安居樂業。並催令將

前次照會早為行知。以便來歲春融會議。旋據該公使照
覆。內稱前次照會。已經繕譯俄文。咨送本國。並備文行知
西恩華爾總督。以為幫助公平辦理分界重事等因。臣等
以該公使照覆。有扶持兩國和好之旨。復行給與照會。以
答其意。仍屬其按照原文。逐層譯解。以期明年分界時迅
速定議。臣等查常住卡倫為界一節。業經逐層詮釋。斥其
誤解。然使條約內中國常住卡倫一語。全無著落。斷難折
服該國之心。而杜其口。明諒等因。輝邁拉胡勒布什。從前
已有俄國建造房屋。勢難再與力爭。因將紫限點至此處。
以符條約中常住卡倫之語。將來分界時。如能按照。臣等

照會所云。自沙賓達巴哈界牌往西。然後直至齊桑津爾湖。以後即照明證等所點紫色之限。與之定議。似可了結。此案。惟該國往來公使。既以此件非其所承辦。而蘇哈勞等又因會議未定。悻悻而去。明年再到塔城時。難保不帶兵豫占地方。以為強詞奪理地步。不可不豫為之防。十月二十四日。欽奉寄

諭。將應行布置之處。層層指示。明證等遵辦。應令明證等遵照豫籌。於明春再議分界時。妥速蒞事。

御批。依議。

給俄國照會

為照會事。現准

欽差會勘西北界事宜大臣明等咨稱。連日與俄國使臣博等商
辦一切。忽俄國添派伊犁匡蘇勒官雜哈營。並未先行知
照。該使臣偏執已見。誤解條約。堅欲統以中國現在常住
卡倫為界。本大臣反覆辯論。仍置不理。並以乾隆年間所
立勒布什界牌。為私行偷立。所有舊址地圖。均不閱看。且
於公所大罵伊犁將軍為小人之行。並云若不依言。只好
帶兵占踞。本大臣等答以分界事宜。總須謹守條約。不得
故意偏解。該使臣反以中國為廢約。因思事關分界。且有
條約地圖可憑。斷不能任聽使臣一面之詞。即使其動兵

挾制○至死亦不能從○惟兩國和好有年○不可因此致失舊
好○彼此均無所益○請照會俄國○欽差住京大臣秉公酌議○
轉行該使臣遵照等因前來○本王大臣查兩國

欽派大臣會勘邊界○均經豫先知照○何以獨臣蘇勒勒官雜哈勞於
會議數次後○始行添派○即添派後亦應心平氣和○據理辯
論○何以動云帶兵占踞○並口出不遜○斥伊犁將軍為小人
之行○此豈和好之道○至所稱條約以現在中國常住卡倫
為界之語○尤屬誤解○查條約第二條○載西疆尚在未定之
交界○此後應順山嶺大河之流○及現在中國常住卡倫等
處各語○其曰及中國常住卡倫等處者○蓋謂分界時亦有

可以及常住卡倫之處。如將至齊桑淖爾湖。必經輝邁拉
胡卡倫之類。非謂統以常住卡倫為界也。是以條約僅載
有及卡倫等處字樣。並無以卡倫為界之語。設使以卡倫
為界。則當時條約。應云西疆概以中國常住卡倫為界。一
語已定。何必云西疆尚在未定之交界耶。又何必派大臣
會勘商辦耶。况下文復載明自沙賓達巴哈界牌末處起。
往西直至齊桑淖爾湖。所謂往西直至者。乃自沙賓達巴
哈往正西科布多邊界之止處。直行至齊桑淖爾湖。非謂
由沙賓達巴哈向西南斜行至齊桑淖爾湖也。若如臣蘇
勒官所稱。則是往向西南。而背條約內往西之語。且既往

西南係屬斜行。更背條約內直至之語矣。觀下文齊桑渾爾湖句下。始有自此往西南之語。益可證自沙賓達巴哈未處起。只可照約一直往西。其距臣蘇勒所云之卡倫甚遠。愈見臣蘇勒官之繞以卡倫為界。實為誤解也。至勒布什界碑。本王大臣案查舊圖。實係乾隆年間所立。乃臣蘇勒指為私立。獨不思現在貴國竟有於中國界內私行堆置鄂博者乎。種種偏謬。明大臣再三講解。不肯聽從。反謂明大臣廢約。欲帶兵占踞。試問如此恃強背理。為守條約乎。抑廢條約乎。即令照上辦理。一一遵守條約。則所分之地。已與貴國大有裨益。而於中國虧損甚多。况欲強占於

條約之外。貴大臣正直聰明。諒必有公論也。因思中國與
貴國和好二百餘年。非他國可比。尤應篤念前好。使睦誼
日敦。方不致為別國所竊笑。況分界事宜。係兩國重務。更
當謹守條約。和平商辦。不得各執偏見。徒事爭論。以致久
稽時日。相應照會貴大臣查照。將以上各節。迅即行知。貴
國分界大臣。令其照約辦理。勿再另生枝節。為此照會。
俄國照覆

為照覆事。接准貴王大臣照會。內載現准

欽差會勘西北界事宜大臣明等咨稱。連日與俄國使臣博等商
辦一切等因。前來。查辦分西北界一事。另有欽派大臣。本

大臣亦未深悉該事情形。難從中判斷。惟本大臣嘗有扶
持兩國和好之心。並知此是本國誠願。相應一面將貴衙
門照會。繕譯俄文。咨送本國總理各國事務衙門。一面備
文行知西悉畢爾總督。以為幫助公平辦理分界重事。為
此照覆貴王大臣查照可也。

給俄國照覆

為照覆事。接准貴大臣照覆。內稱西北分界事宜。本大臣
嘗有扶持兩國和好之心。等因前來。足見貴國本以和好
為重。而貴大臣聰明正直。人能常存公平辦事之念。扶持
兩國和好之心。本王大臣展閱之下。實深欣佩。是貴國與

中國和好有年。並非虛語。所有分界重事。如貴國將本衙門兩次照會。按照原文。逐層詳解。則明歲兩國分界大臣。必可公平定議。不獨兩國友誼日敦。即彼此久經和好之真。益可取信於遐邇矣。為此照覆。

給俄國照會

為再行照會事。准會勘西北界事宜大臣明等來文。內稱前件會議未定。貴國分界大臣整旅回國。業經以禮護送。起程回國等因。本衙門查塔爾巴哈台北地高寒。大雪封山最早。現時節屆隆冬。貴國分界大臣自係難於久待。惟是轉瞬春融。自必再申前約。若不趁此閒暇之時。從容商

定。誠恐彼此往返。多勞跋涉。日前本衙門照會貴大臣。業將咸豐十年商定條約。一一聲明。自不難於遵約辦理。條約內自沙賓達巴哈往西。直至齊桑津爾湖。西字直字。均經逐一講解。毫無疑義。至齊桑津爾湖。迤西南。既有勒布什界牌。為中國南北適中之定界。其界以外之哈薩克。布魯特。臣服中國有年。貴國與中國久經和好。所有哈薩克。布魯特。兩項官民。自應仍前安居樂業。毋令一夫失所。所有前次照會。務希早為行知。貴國分界大臣。洞悉原由。豫為履知。以便來歲春融會議。一到即定。庶可早為完結。以歸簡易。而免重勞。相應再行照會。貴大臣查照。

致分界大臣明領等信

閏八月二十七及九月二十五等日○先後由軍機處交出
尊處具奏會議分界事宜○未能定局○並俄使堅欲以常住
卡倫為界○各摺片○並臺奉

諭旨○令本處與俄國在京公使面議○本處遵即查照摺內所開各
情形○及地圖界限○與該公使已留捷克○而為剴辯○往返數
十次○詎該使甚為狡獪○每至詞窮○便以未悉情形○藉詞諉
卸○因於本月十九日給與照會○現尚未據覆回○緣恐尊處
懸望○先行鈔錄移咨米案○本處查此件係屬遵照和約辦
理○自應細譯條約○逐字推敲○方可免將背約之名坐在中

國。况雖哈勞執定以常住卡倫為界。若不先將條約此語
指出著落。無以杜塞其口。是以本處公同商酌。按照繪來
地圖紫限。指出輝邁拉胡卡倫。告以分界時亦有可以及
常住卡倫之處。並非謂統以常住卡倫為界。恐其仍有狡
執。因將條約內往西直至四字刻出。其緊要關鍵。尤在一
西字。以下層層分疏。告以自沙賓達巴哈往正西科布多
邊界之止處。然後直行至齊桑淖爾湖。條約中西字直至
應如此解。如照此辦。方為違約。不照此辦。即為背約。並面
告以試看西南二字。書在齊桑淖爾湖之下。足見至沙賓
達巴哈未處起。只可違約向西。不可背約向西南。只可由

科布多極西北之邊界。邊約直至齊桑淖爾湖。不可背約。
斜行至齊桑淖爾湖云云。果能照此辦理。則唐努烏孫海。
及蒙古住牧等處。自不致為所侵占。疊次向該公使往復。
詰難。該公使雖復仍前執執。而其詞不直。其氣已餒。答稱。
此件未能遽定。只有備文與伊國大學士酌斷。此本處連。
日辦理情形也。正在具函間。復經接到諸公原奏。內曉諭。
哈薩克公等妥撫之詞。甚為得體。近邊諸處。均可照辦。至。
齊桑淖爾湖西南地界。本處給與照會內。指明勒布什界。
牌。為乾隆年間所立。以破其卡倫為界之語。除尊處先後。
原奏。現在籌議。統俟覆奏咨行外。先行專函。並繪圖貼說。

奉中○再照會欽述原文○係隨時酌量情形○擬○併以奉布○
甲寅○江蘇巡撫李鴻章奏○俄國提督頗頗福○於十月十六
日○由日本行抵上海○十八日○帶同該國兵官奇頗叔等○來
臣鴻章營次面晤○據稱該國主與中國

大皇帝實心和好○聞海口不靖○派令前來幫同堵剿○現帶到兵船
三隻○餘船分布東洋○自日本以至黑龍江○所在皆有○聽調
即來○該提督日內仍赴東洋○兵船常住上海○如有事相商○
即告知奇頗叔辦理○該提督仍來往照料各等情○臣再四
探詢○既來自請帶兵入江○亦未要求專防何口○其詞氣禮
節○較之英法兵官○更為遜順○當頗頗福未到之先○英國提

督每與臣鴻章會商兵事。輒謂俄國因何派兵來此。意頗猜忌。甯紹台道史致諤來稟。亦稱甯波洋人。不願俄兵在彼泊防。臣細結頗願福是否與英法提督相見。遇事是否相商。據云到滬後。日相往還。甚為和睦。現在兗太賊氛。距上海百里以外。原無庸兵船協防。惟該提督奉命遠來。既不便輕調入江。又不便派防別口。自應仍照該公使已留捷克所請。卽今該兵船暫住上海。藉可制英法把持要挾之意。臣惟優以禮貌。拊以溫詞。其果否暱就於我。不至或有狡執需索情事。容再隨時察看。妥為駕馭。

諭議政王軍機大臣等。李鴻章奏。俄國兵船到滬情形。覽奏均悉。

俄國兵船三隻。業已抵滬。情形遜順。卽著照所議。留於上海。隨時駕馭防剿。該國在京公使已留捷克。與總理衙門王大臣面稱。此次來滬兵船。不過數隻。頗願福所云。自日本以至黑龍江所在皆有懸調之語。未盡確實。著薛煥。李鴻章。相機接待。用敦和好。

乙卯。辦理通商事務大臣薛煥。江蘇巡撫李鴻章奏。查荷蘭一國。與通商各邦。同居歐羅巴洲。而於布路斯。比利時。均屬連壤。該國通於中華。久稱恭順。誠如

諭旨。當可援照比利時國之請。准其議立條約。聞八月內。該國總領事方姓。呈遞。臣煥中陳。請將懇立條約一節。奏乞

恩施。並請候奉

旨復行知該總領事。以便報伊本國。派委大臣前來議辦等情。我
國家示信遠人。自應由臣煥給予副覆。惟此時該國尚未遣
使。似未便由中國招之使來。且外國情形。最易得步進步。
議事之初。不遽全行允許。迨彼再四懇求。東機予以通融。
乃可恰如分際。荷蘭國稱馴順。仍宜豫加防維。臣等仰蒙
諭飭。相機妥辦。欽遵會同密籌。先由臣煥發給該總領事副文。曉
以荷蘭在中國通商最久。甚為和好。現在比利時國業已
立定條約。應俟互換之視。可將比利時國條約。鈔發荷蘭
國一體照行。俾商人有所遵循。荷國毋須另派大臣前來

議立條約。以昭信睦。而求簡便。且荷國商人。久在中國貿易。雖未立約。彼此均極相安。一經立約。則各口均須由該國專派領事。不得以商人充當。於該國亦多繁費等語。但該國既以立約為請。竊料終當遣使前來。此時所給劉文。明知該國未必聽從。不過稍寓豫縱。為將來互議條款時。杜其續請之計。

諭議政王軍機大臣等。薛煥等奏。遵籌荷蘭國通商事宜。並鈔給該領事劉文呈覽一摺。此次荷蘭國懇請換約。經薛煥示以和好。曉以利害。所給劉文。誠信周到。甚為得體。第該國既以換約為請。恐日後仍遣使前來。現在給予劉文之後。該領事方姓有

無他語。仍著薛煥。李鴻章。留心察看。隨時具奏。儘該國遣使前來。即著薛煥等妥為辦理。

戊午。浙江巡撫左宗棠。江蘇巡撫李鴻章奏。本年八月間。浙江逆匪竄踞泗門鎮。已革道員張景翼。赴餘姚會商英國兵船。嚴守慈谿。並調總兵勒伯勒東前往。及稅務司日意格。帶兵會剿。直搗上虞縣城。節節進剿。連破賊卡十四座。勒伯勒東。日意格。揮兵傷卡。連放炸礮。斃賊十餘人。乘勝踏毀通明堰賊卡二座。中外官軍直薄城下。日意格躍馬當先。右臂陡中槍子。負救回營。勒伯勒東運到車輪大洋礮。轟塌城牆。官兵奮勇登城。賊由西南逃竄。十月初一

日克復上虞縣城。泗門等處賊匪。亦經中外官軍合力掃蕩。餘地全境肅清。法國參將勒伯勒東。自奉

旨准受中國官職。感激國報。英國水師總兵。味樂德克。屢次助援。

甯關稅務司。日意格。會不顧身。通達大體。均擬請

天語褒獎。以示榮寵。

左宗棠又奏。臣奉寄

諭。法國因甯波海口喫緊。願將伊國副將勒伯勒東。准受中國職

仕。帶兵防勦。現由總理各國事務衙門與之定議等因。欽此。旋

經薛煥。李鴻章。奏錄移咨到。臣李鴻章。撤吏致謬。給與勒

伯勒東照會。臣給與別憑。臣初以甯波距上海近。臣

軍連中隔賊氣。暫難兼顧。且李鴻章威名丕著。中外咸知。非臣所及。臣於甯波兵事。既屬史致瑤就近稟承。則勒伯勒東劉恩。應由李鴻章就近發交。方資控制。雖思法國之請。以勒伯勒東權受中國職任。聽撫臣及甯波道節制。自係就轄境而言。洋將之受中國職任。本是偶爾權宜。異時更易撤留。仍須由浙主政。自宜先正其名。已繕備勒伯勒東署理浙江總兵劉恩。由安慶輪舟遞史致瑤轉發。並咨薛煥。李鴻章知照矣。臣雖人無中外。其好惡同則情理一。忠信為敬。蠻貊可行。內治外修。遠人自服。如賞功罰罪。不秉大公。諱敗攘功。不務裏實。以及冒銷錢糧。侵扣軍餉。皆

主兵者所最忌。有一於此。却曲尚且嫌心。况以之施諸荒
道內附之人乎。史致譯人尚明白。或不至此。且亦當隨時
誥誡。期免愆尤。惟是沿海各郡。自五口既開之後。士民嗜
利忘義。習尚日非。又自海上用兵以來。至今未覩戰勝之
利。於是妄自菲薄。爭附洋人。其黠者且以通洋語恣洋情。
粹致富貴。趨利如鶩。奉國若狂。自洋將教練華兵之後。桀
驁者多投入其中。挾洋人之勢。橫行鄉井。官司莫敢詰治。
近聞甯波提標兵丁之稱壯健者。且多棄伍籍而投洋將。
充勇丁以圖厚餉。此常勝一軍所以增至四千五百人也。
若不稍加嚴禁。予以限制。則寇日強而主日弱。費中土至

張之鉤。而貽海疆積弱之憂。人心風俗。日就頹靡。終恐非計。臣擬熟察情形。俟浙江局勢稍有轉機。再與曾國藩。李鴻章。徐商妥策。

謝內閣。左宗棠。李鴻章奏。中外官軍。克復上虞縣城一摺。本年八月間。浙江逆匪竄踞泗門鎮。經已革道員張景嵩。前赴餘姚會商英國兵船。嚴守慈谿。並調總兵勒伯勒東前往。及稅務司日意格帶兵會剿。直搗上虞縣城。節節進剿。連破賊卡十四座。勒伯勒東。日意格。揮兵偏卡。連放炸礮。斃賊千餘人。來勝踏毀通明堰賊卡二座。中外官軍。直薄城下。日意格躍馬當先。右臂陟中槍子。負救回營。勒伯勒東運到車輪大洋礮。轟塌土城。逆賊

逃遁○卽於十月初一日○將上虞縣城克復○其泗門等處賊匪亦
經中外官軍合力殲蕩○餘姚全境肅清○此次勒伯勒東○自授中
國總兵職任○卽能踴躍用命○稅務司日意格○奮勇爭先○身受槍
傷○均能陷陣推堅○克稱厥職○實堪嘉尚○仍著飭令各軍○督同總
兵勒伯勒東所部○進攻紹興郡城○迅圖克復○

諭議政王軍機大臣等○左宗棠○李鴻章奏○中外官軍攻克上虞縣
城一摺○左宗棠奏○給發勒伯勒東劉付○據法國哥士耆函致總
理各國事務衙門○言及克復該城○係先在城外踏毀賊營○奪橋
焚卡○中國官兵○以少勝多○頑稱得力○惟縣城克復○而城中絕無
動靜○遣人往視○始知賊已宵遁等語○與此次所奏官兵奮勇登

賊由西而逃。實情形不符。與外國人共事。全在半。以誠信。若稍有粉飾。卽為所笑。史致諤。哥爾德。軍情。沾染軍營。惡習。必須嚴加訓飭。庶可力挽頹風。並飭令嗣後。務須據實詳報。不得一字虛假。以杜外國口實。勒伯勒東。業經左宗棠。發給劄憑。令其統率一軍。惟以洋人教兵領隊。流弊極多。朝廷早已慮及。是以前此有准減不准增之諭。左宗棠所陳各情。與朝廷之意。脗合。總總撫等。必能遵旨妥辦也。

發亥。總理各國事務恭親王等奏。本月初七日。准法國公使哥士者。照會。內稱。現奉該國諭旨。著三等提督若勒。帶領別項兵船。前往中國。並云。現已飭知若提督。定於明

年二月來京。聽候面議。至其時如何辦理之處。均在湖南。江西。貴州。四川。各督撫把握之中。如各該省辦結所事。允協。若提督照舊在上海各處。協同官兵助剿等語。且等查外國自主和約以來。如英法俄等國。現均有兵船。情願隨同中國官兵助剿。法國此次所云帶領別項兵船前赴中國。或更為見好地步。第細譯來文。有如何辦理。均在湖南。各督撫把握之中。窺其意。顯因各省教民案件。未能盡遂所請。特作惻喟之語。藉端要挾。而又隱約其詞。其居心已可概見。臣等以該使來文並未明言。不值與之深論。惟該使情詞狡詐。不可不豫為之防。復查本年七月間。該使來

函○敕及教民各案○卽有親赴長江各省會辦○於友睦之誼
恐有妨礙之語○又十月間○該使復函稱○此後川省如有絲
毫欺侮教民事端○卽不候商議酌辦○將本國旗號落下○連
行去此他往○若不能照辦○卽當以此函改繕照會○送請查
照等語○臣等以其屢次清請○業經屢次行文各省督撫○於
交涉教民事件○速為持平辦理○設法了結○乃該使並不候
外省查辦○輒自逞其臆見○辯論嘵嘵○今復以該國派領兵
船率行照會○且請臣吏斂鼎力措處○臣等公同酌議○固不
可示之以弱○愈堅其要挾之心○亦未便置若罔聞○致激其
羞忿之念○相應請

查飭下湖南。江西。貴州。四川。各督撫。凡有教民案件。要速辦結。免
該使有所藉口。以杜釐端。且等從緩商酌。再行給與照覆。
諭議政王軍機大臣等。總理各國事務衙門奏。江西等省教民事
件。請飭迅速完結。並鈔錄法國照會呈覽一摺。據稱法國住京
公使哥士者。於該衙門呈遞照會。有提督若勒恩帶領別項兵
船。於明年二月來京。聽候面議。其如何辦理。均在湖南江西貴
州四川各督撫把握之中。如各該省辦結所事允協。若提督即
在上海助剿。請飭四川等省安速辦結。免致藉口等語。法國派
兵在上海等處助剿。已非一次。此次照會內所稱各情。顯因教
民案件未能盡遂所請。作此恫喝之詞。豈能遽為所懾。第天主

教自弛禁以後。教民案件。卽係地方大吏應辦之事。况外國人
性情卡惠。值此多事之秋。不能不稍順其意。免致掣肘。中外交
涉事件。如果中國理長。固可與之力事。然尚有多方狡執之事。
若貴州等省。教民一案。難保非濫殺無辜。若再遷延不結。難免
外國人藉口有意延擱。總理衙門王大臣。僅能以口舌爭論。自
不足以折服其心。勞費尤現在行抵何處。卽著葉程馳赴黔省。
潘鐸早已抵黔。著卽會同崇實。先行妥商善辦。駱秉章前有旨
令毋庸辦理教民事件。惟該督久任封圻。見識周到。或崇實有
呼應不靈。以致辦理或有未能得力之處。該督仍應暗中商酌。
至江西。湖南。教民案件。沈葆楨。毛鴻賓。亦當趁期妥辦完結。毋

任日久遠延。致生意外要求。該將軍等於中外情形。諒亦知之。有素。儘再延緩不結。致滋事端。恐該將軍督撫等不能當此重咎也。法國原照會。著鈔給閱看。

法國照會

為照會事。本大臣現奉本國總理各國事務大學士劉勳。恭奉上海。著三等提督若勒思。帶領別項兵船前赴中國。所有經朕派往中國海洋兵船一幫。及屯紮陸路各營兵。均歸總統。欽此。欽遵轉行到署。本大臣奉此。相應知會。貴親王。行。文。兩江。兩廣。閩浙。湖廣。四川等省。各督撫知照。本大臣現已飭知若提督。定於明年二月來京。聽候本大

臣面議一切公務。至其時如何辦理之處。均在湖南。江西。貴州。四川。各督撫把握之中。如各該省糾結所事。均見允協。則若提督自必照舊在上海各處。協同官兵勦賊。以敦友睦。而本大臣修好息事之心。亦可一為豁然。惟望貴親王鼎力指處。俾得及時果如本大臣此言。是所至願。為此照會。

恭親王等又奏。准軍機處交出署江蘇巡撫李鴻章奏。上海豆石。仍歸內地商人轉運一片。同治元年六月二十六日奉。

旨。總理各國事務衙門妥議具奏。欽此。臣等查洋商販運豆石。原

為條約所不准。嗣因本年春間。髮逆逼近上海。各國代為防剿。英國因此從中求請。臣等以賊氛正熾。故極力牽韋。允其所請。經臣等奏。

准在案。茲查李鴻章所奏各情。臣等以緣海編氓利賴所關。當即照該撫原奏大指。照會英國公使。婉為開導。令其於上海一口。仍守舊約。詎該公使久延不覆。經臣等屢催。於十一月初一日始行照覆。其詞意雖屬強辯。而大指仍以助勦髮逆。防堵海疆為詞。復據英國威妥瑪來署。經臣等重加辯論。據威妥瑪面稱。現在英國撥兵在上海助剿。餉無所出。商人將恃此款以濟軍需。俟將來賊匪稍平。再行議辦。

等語。○且若據約力爭。雖可折讓。使強辯。但現在江南軍務漸有端倪。恐決裂之餘。又復多生枝節。雖上海軍威已振。不必全恃外國以為聲援。其一因此生心。暗中與賊勾通。則進剿大苟。不無窒礙。仍應俟蘇松各屬肅清。內地可以自強。再與英國公使商量。踐守舊約。似於安內敦外。均能妥協。

御批○依議○

乙丑。黑龍江將軍特普欽奏。上年黑龍江右岸地方。有俄人越界在雅克薩對岸私墾地畝。當經咨飭副都統衙門。派員與俄商議。該署首薩斐欽已給字據。下年再不違

約耕種。乃本年夏間。復經該副都統衙門咨據巡河委員
報稱該處又復增種五十餘畝。並在阿奇夏納地方種地
四十餘畝。恃其人眾我寡。不讓平毀。並稱係其上司飭令
復種。迨經派員與俄首布色依刺辯。俄首始則推託上年
字據為署首所給。伊不知情。本年越界種地。係奉其上司
明文。因江左二屯山多。暫在右岸耕種。伊不能主持。俟再
轉報該上司。聽候辦理。復經咨飭該副都統派委委員。
再與理諭。該上司既已先行違約。指飭屬下人等越界妄
行。於屬下人等毫無約束。何以未救和約。該首理竭詞窮。
始復另給字據。嚴禁所屬。下年再不違約越界耕種。比及

往返查辦之際。而俄人已將禾稼收去。亦認稱該苗已經
割飭嚴禁。下年不復耕種等因咨報前來。芽伏查沿江地
面。自額爾固納。至黑河口三千餘里。江左俄屯處處接連
不斷。而江右一帶多屬曠地。並無人居。每年派員上下巡
查。卽遇有越界耕種之事。與之理論。決不聽從。欲卽平毀。
則彼眾我寡。橫行攔阻。且不便以微事與之啟釁。迨與該
督上司持約商辦。又復推託耽延。仍將田禾來陳收去。本
年雖又給字據。難保下年不仍蹈故轍。似此輾轉推託。實
屬狡詐異常。除咨黑龍江副都統。嚴飭下年巡江各員加
意防禁。並將現辦情形。咨呈總理各國事務衙門查辦外。

謹附片具奏。

御批。總理各國事務衙門知道。

辛未。總理各國事務恭親王等奏。本年十一月初十日。因官軍會同外國兵弁。克復上虞等處。曾經明降

諭旨。宣示中外。茲法國公使哥士耆。因恭讀此件。

諭旨。內敘該國武官勒伯勒東等戰功之處。緊承上英國兵船嚴守慈谿句下。謂未將法國二字揭明。冠於勒伯勒東。日意格等名字之上。將使邸鈔傳各國。總疑勒伯勒東為英國之人。而該國武官血戰之力。未免湮沒。於十七日。繕遞片等照會一件。專奉此事。並摺拾舊事。填砌多詞。復將從

前外省之事。撥出。連日。逃。臣衙門。照會數件。曉曉不止。而其意無非為前件。

諭旨內。未提該國而起。查從前該國公使等面晤。曾言如英法兩國同辦一事。不可漏教一國。兩國勢均力敵。不可常以法國屈下。各國既經換約。不可仍稱為夷等國。查該國等互相情忌。各不相下。往往以無關緊要之事。異常爭執。視為萬不可移。不值因此小節。與之辯論。除將所言由。臣衙門存記外。謹恭摺陳明。

諭內閣。前因浙江甯波海口。關係緊要。無武職大員統帶。特諭秦如虎前往署理浙江提督。嗣據秦齡奏。秦如虎傷發未痊。尚未

馳赴新任。因思已革道員張景翼。會同法國武官。今充中國總兵之勒伯勒東。及現充稅務司之法國人日意格等。奮勇立功。克復上虞縣城。復力圖進攻紹興。甯波府城。不可無武職大員前往鎮守。著着齡卽飭奏如左。迅速馳赴著任。毋稍延緩。

諭議政王軍機大臣等。前因總理各國事務衙門奏。江西等省教民事件。請飭迅速完結。當經諭知崇實等。將貴州教民案件。剋期查辦。現在法國公使哥士耆。在京呈遞條款。語多卞急。已由總理衙門行知該將軍等查閱。值此多事之秋。豈可另生枝節。該公使所呈。固屬一面之詞。難以直行照辦。有乖團體。但教民一案。如果迅速辦結。亦何至滋多口舌。崇實於五月間。諭令辦

理此案。潘輝亦於前月諭令赴黔查辦。諒已早抵黔省。何以該將軍等竟無一字覆奏。遲延遲誤。殊非勤慎辦公之道。著於接奉此旨後。迅速會商。秉公辦理。將救民案件。即行奏結。不得遲至明春。致糾理更形棘手。勞崇光以復替之員。素敢保用。現在行抵何處。即著兼程前進。毋得以道路難行。任意延宕。

法岡照會

為照會事。前在總理衙門見貴親王。聞有

上諭宣示克復上虞一事。並經貴親王告知。此次在事員弁。未及敘明勒伯勒東原係何國之人。本大臣因勒副將現在既

為

貴國總兵。卽不敘明來屆。亦甚妥協。總理衙門錄寄。

上諭。均無舛誤。昨偶檢校通行刊報。所載。

上諭。內有英國兵勇四字。與所錄作外國兵船四字。顯然改換。查。

此次實係本國武員。立意調度進剿。大有功於。

貴國。卽餘姚地面。兩國皆有兵船。該道員自必向兩國總兵。

籌商。何能專歸之英國。現今。

貴國各省官民人等。聞至本月十三日。岬鈔。必皆謂此戰由。

英國主持之力。所有本國弁兵。不過隨同助陣。且勒伯勒。

東。日意。檣外間。並不知為何人。是本國人當先血戰之勞。

一概抹為無有。如此辦理。除朦混本大臣外。

貴國無緣無故。以此開罪本國。而自執其國計。又何疑訝於貴州湖南江西雲南四川等省地方官之待本國人。如同異類。所有各案。年餘以來。絲毫不辦。且何疑江西金谿縣知縣。見本年三月初六日。

上諭。聲言不能遵照。候法國兵到再辦等語。其湖南長沙城內。昨八月間。又有滋事之案。

貴國主言偏重之處。非此一次。去年曾有

上諭。列示肅順罪狀。內敘前年打仗之事。只以英國已領事為言。近兩三月前。廣東勞制軍請兵保衛。亦只言英國領事。視本國領事如未在其地。夏間嘉定亢復。

上諭內閣欽英國何提督戰功。本國著理提督福。因此傷亡。而竟未道及。其餘細事。如此尚多。可見

貴國不曾明白彼此推重之道。見本國及本大臣專心以和好相待。反疑本國有畏懼之意。本國未在中國。代出血力。賈貨財。

貴國不知為報。專以本國列為第二國。善天下除

貴國外。到處皆無此理。不得以

貴國未能諳悉歐羅巴情形。而本國應在此。自卑國體。本大

臣兩年以來。用意全謬。請自明日始。辦理各事。本大臣當盡反從前所為。此後如一。有此種糾錯。本大臣立即飭知

本國提督等官。概即禁止各路弁兵。毋庸會同官兵堵剿。貴國仍仰英國助復之力。自可聽便。為此照會。

乙亥。成都將軍崇實。四川總督駱秉章奏。臣等前奉

諭旨。會同兩廣督臣勞崇光。查辦黔省擅殺教民一案。臣等揀派

候補道宣維樞。協領吉祥前往。迄今三月有餘。並無稟報

前來。黔省擅殺教民一案。法國之人既與田興恕結怨。田

興恕不離黔省。此案終難了結。臣等如再奏請

嚴諭飭令來川。則田興恕愈懷疑懼。不惟不肯遽離黔省。且慮年

少武夫。逞其方剛之性。或竟洩忿教人。枝節橫生。更難消

弭。臣等躊躇再四。欲使黔省傳教之人帖服。必須素有威

望大員○前赴黔省○能將田興恕鈴束○使之俯首聽從○方坦
然無疑○自離黔省○則聲端既得○不致再有葛藤○伏查張亮
基○奉

旨○前往雲南督辦軍務○傳言滇回聞張亮基帶兵繼進○愈懷猜貳
是張亮基赴滇○患發愈速○查張亮基久任封圻○較之韓趙
歷練日久○前在署湖廣總督任內○田興恕由勇丁殺賊立
功○踴拔守備○田興恕知其由川入滇○時適啟候○張亮基現
抵敘郡○隨從楚勇及雲南制兵○尚有一千餘名○足張威勢○

懷蒙

朝命量移赴黔○既於雲南不至激而生變○張亮基既善駕馭○而田

與船復望成全。必能戢其驕矜。以聽驅策。或使之回藉養
病。或調赴他省立功。則法國之策。可以設法了結。黔省不
至有意外之虞。是一舉兩得。似為妥善。

崇實又奏。恭摺奉

密諭。嗣後川省關涉教民事件。即著貴成崇實妥辦。駱秉章著毋庸管理等因。欽此。等因。

命之下。不勝悚惶。伏查和約未定以前。各省傳教不乏其人。即以
四川而論。傳教者來此已數十年。入教者已數千戶。何以
相安無事。彼時教人皆深自斂戰。與齊民為伍。故漸習而
相忘。迨至弛禁以來。彼教之士。未免夸張。雖自尊大而奸

民入教者亦憑藉其勢得以招搖。甚至欲與本地官員抗
禮。每以口角細故動輒成訟不休。且有匪徒假冒橫行無
忌。鄉愚積不能平。官紳亦漸嫉怨。復有識見拘墟特論迂
腐者。因顧時勢倡為屏黜異端之說。小民附和致起弊端。
亦由教人激成眾忿而主持大吏既欲顧全和議復欲將
順輿情調劑為難。動多扞格。非欺官紳之望。卽失遠人之
心。措置稍一失宜遂於大局有礙。督臣駱秉章公忠素著
中外咸知。到川以來與才遇事相合並無纖芥微嫌。且督
臣以封疆重任經理教事已有年餘亦深慮其中種種為
難。斷不至意見參差。才亦萬不敢不力持大體以求息事。

惟一省之大。教民雜處其間。與地方交涉之事。日見紛繁。諸多窒礙。凡此情形。不得不豫達。

宸聽。其有煩瑣不敢冒瀆。

聖慮之處。業已將詳細各情。密函諮商總理各國衙門王大臣。俾得籌畫妥協。洞悉中外情勢。庶可隨時請。

旨。以期於事有濟。此後才遇有一切事件。仍當小心詳審。與督臣密商妥辦。

諭內閣。張亮基著以總督銜署理貴州巡撫。並署理貴州提督印務。無論行抵何處。卽行馳赴新任。毋庸來京請訓。韓超。田興恕。現有缺畝各款。均著撤任。留於貴州聽候查辦。

諭議政王軍機大臣等。據崇實。駱秉章奏。遵查教民案件情形一
摺。所籌尚屬周妥。黔省教民一案。前經降旨。令崇實等會同潘
鐸查辦。現在潘鐸業已行抵滇省。接印任事。勢不能再行折回。
張亮基尚在敘州。距黔較近。本日已明降諭旨。令張亮基署理
貴州巡撫。並提督篆務。著卽行折回赴黔。將本日寄去之明發
諭旨宣示。仍卽迅速覆奏。以便發鈔。貴州教民案件。結案過深。
崇實。駱秉章均如原委。卽著詳悉密函告知張亮基。於接印後
迅速查辦。會商崇實奏結。不得再事遷延。勞崇光行抵何處。久
無奏報。殊深盼望。著仍遵前旨兼程前進。毋再延緩。崇實另摺
奏。教民案件難辦各情。請仍與駱秉章密商辦理一摺。駱秉章

久任封圻。洞悉事機。所見自在崇實之上。仍著該將軍遇事密商。以期周妥。崇實亦不得稍存推諉。法國住京公使哥士耆。因教民一節久未辦結。諸多饒舌。所有一切詳細情形。已諭總理各國事務衙門。另行密咨崇實等查照矣。

丁丑。總理各國事務恭親王等奏。本月十一日。法國哥士耆來署。呈遞所擬條款。內開十二條。大指因貴州殺害教民一案。擬請將田興如抵罪。並索賠償教民銀兩。當面求臣奕訢畫押照准。臣奕訢當即據理斥駁。該使即負氣而去。臣等仍欲婉為開導。冀其感悟。於十四日。臣文祥。臣崇綸。臣董恂。臣恆祺。前往法館。再三辯論。詎該使堅執前議。

牢不可破。於十八日遞臣等照會。將十二款黏鈔前來。其情詞背謬。比前較甚。且有所定條款稍減。斷難依從。請於十日內將各款辦法決定。或不能照准。另自備辦等語。臣等查天主教一事。自道光二十四年業已開禁。嗣後酌定條約。亦未能刪去。臣等接辦撫務以來。明知此事為風俗人心之所關。且與內地良民不相洽。第當四方多事之秋。和約已定。只得持平辦理。以期相安無事。故每於法國傳教案件。或請

旨飭辦。或函致各省大吏。委婉妥商。原為念切時艱。故不能不畧為遷就。無如該使得寸進尺。肆意要求。窺其用心。直以為

打破此次關頭。此後卽為所欲為。更無忌憚。若不示以限制。勢將逐漸加增。滄海橫流。伊于胡底。且等照覆該使。按照條約。決於兩言。祇許賠償。不能抵罪。並有甯可以身當禍。斷不能為萬世之口實等語。誠以哥使此次照會。語多挾制。若復將順其意。勢必長其驕矜。愈形棘手。惟臣與斯與之照會。雖稍近巖峻。然軍關中外。亦不敢逞一時意氣。以貽大局之憂。俟該使照覆前來。再行相機商辦。隨時具奏。

諭議政王軍機大臣等。總理各國事務衙門奏。接據法國照會。謹將辦理情形。並鈔錄照會照覆。哥士者所遞條款呈覽。法國於

貴州殺害教民一事。竟竟不已。現復呈遞照會條款。萬難俯允。經恭親王等給予照覆。雖屬詞義嚴正。惟今已數日。該公使毫無動靜。已令由該衙門隨時相機開導。貴州殺害教民之案。辦理粗暴。田興恕。韓超。均不能辭咎。是以先後將該二員撤任查辦。然無論其罪如何。亦斷無遽憑該公使一言。卽令其抵償之理。田興恕已奉旨令赴四川。數月之久。託病不行。風聞該提督跋扈日甚。於巡撫衙門所奉密旨。及密奏事件。均須先行拆閱。且於沿途設卡。借稽查為名。拆閱各項公文。韓超為所鉗制。一味將順其惡。昨已有旨撤任。令張亮基赴黔署理撫篆。著卽趕緊取道赴任。將田興恕撤任查辦。田興恕曾株張亮基麾下。諒

必有法辦。前雖有旨令駱秉章毋庸辦理教民案件。惟貴州一案。及嗣後四川關涉教民之事。仍著駱秉章暗中幫同辦理。著卽遵奉。歷次諭旨。妥速籌商。總應先去田興恕兵柙。或調離黔省。然後該處教民始可相安。該國住京公使。亦不致再三餽舌。此後辦法。若能如恭親王等所奏。祇許賠償。不為抵罪。則國體人心。兩無所失。亦可相安無事。勞崇光為外國人所敬服。前已有旨令赴貴州查辦事件。何以日久無奏報。該前督現在已否起程。著卽兼程赴黔。與張亮基會商。並與崇實。駱秉章。商妥辦。總期上顧國體。下奠民生。不激不隨。方為盡善。總理各國事務衙門摺。並照會條款。均著鈔給閱看。

法國哥公使面遞條款

大清欽命總理各國事務和碩恭親王會同大法欽差公使大臣哥。惠依兩國和好。據照和約定例。將貴州官員矯殺。誣良一案。議准處置各款如左。

一。貴州巡撫韓。應即革職永不敘用。

二。田興恕。趙長。戴虎芝。三犯員。應即拏問到京。押赴市曹處斬。以彰顯戮。

三。田興恕等臨刑之前一日。由總理衙門先行照會全權大臣公署。即當派委文武員弁各一。及兵丁十名。屆時前赴田興恕等刑所看視。除武弁一人未便撤去身邊佩刀。

其餘兵丁概不得攜帶軍器。

四。田興恕等處決之時。應請

頒發

諭旨宣示。此案因田興恕等。及韓起連背法國和約第八第十第

十三第三十八等款。分別斬決革職。罪有應得。

五。貴州查辦事件。勞大人。宜著禮服親拜貴州胡主教。並

面述

大清國

大皇帝聞知該省此案。甚為惜念等語。

六。田興恕於去年在貴州省城六硯橋地方。自建私宅一

所。現制甚是闊大。現在應請查封。由勞大人查明該處各項房屋。盡行送給胡主教收管。為天主教公業。並即改建天主堂一座。其臨街大門上。應豎匾額。書明

大清國

大皇帝欽賜該處教中之業。

七。蓋州城內。應著趙長三。戴鹿芝。兩祀員家屬。覓置地墓十畝上下。建造天主堂一所。送為該處教中公業。

八。從前被害八人。計四在蓋州。四在青岩。現在應於兩處各為修築墳墓。務須富麗。並於墳前各建牌坊一座。

九。從前被害諸人。各有家屬。現應給予每家銀六百兩。

十。前此田典認屬員兵弁。屢至天主堂焚掠書籍。並服用
各物甚夥。今應詳查送還。最要者凡有書籍。必須全交。不
准稍有藏匿。此外借銀五千兩。送給主教贖補各物。所有
連上各款費用。均應勒令趙畏三。趙國澍。及萬姓。陶姓。四
員公同籌辦。

十一。現今貴州梅衛二傳教士在京。應即給予護照。並飭
沿途優待。俾得妥還貴陽。

十二。以上各款。均期於明年二月以內辦結。彼此毫無異
說。如屆時未盡照辦。即由法國公使大臣另自籌辦。則所
行條款。必有大不利於中國之處。

給法國照覆

為照覆事。接准貴大臣照會。并責多端。幾欲置和誼於不顧。和約乃

大皇帝所主持。本爵與貴大臣皆不當以一人之喜怒而視若弁髦。查中國之例。殺人者抵。此謂平民而言。僅係大臣。非罪大惡極。交九卿詳議會同。雖我

歷朝大皇帝亦不敢恃

九重之威福。而遽加殺戮。此中國向來定法。貴非本爵一人之私言也。然此猶中國之例。貴國恐未必以為然。查補約第一款。內載西林縣張鳴鳳。將馬神父妄行殺害。本條有罪

之人○應卽革職○以後永不准蒞任等語○張鳴鳳殺害馬神
父一案○與田興恕此案事同一律○亦不過革職永不敘用
而已○并未開將張鳴鳳違行正法○貴大臣乃謂本爵視條
約為廢紙○恐不盡然○故本爵不敢蔑視條約而妄擬辦法○
以得罪於天下後世○並失歡於貴國○此本爵辦理和誼以
求實在之苦心○並非自今日始也○至於此案○每於貴大臣
來一照會○來一信札○無不立刻辦理○於本年五月二十三
日○七月二十六日○九月二十七日○十月初五日○十一月十
五日○屢經奏明請

旨辦理○又於閏八月二十九日咨催○又於十月初三日函促○並未

有片刻耽延。實因深念貴大臣和好之深心。故此加緊辦理。無如貴州遠在數千里之外。現值軍務倥傯。加以路途梗塞。該省未將原案查明咨覆。本爵只得嚴以催之。今貴大臣不加體諒。急如星火。限十日議定。如果立刻可定。本爵豈不甚願。何必遲至十日。然此皆是事勢無可如何者也。總之本爵為

文宗顯皇帝之弟。與

國家同休戚。若事關國體。自不能復顧一身。且向來辦事。祇論情理。不計禍福。苟情理之既當。即禍害亦不辭。是以田興恕等人雖不足惜。無如此舉乃羣情所繫。公論所存。降

約所載。本爵不敢輕於一諾。以為萬世之口實。今日之事。若論賠償。中國雖因軍務緊急。款項支絀。但念死者不可復生。情殊可憫。其家人婦子。例應體卹。無論如何勉力。本爵無不可從。並可定於明年二月辦結。如屆期不能將賠償之事辦結。本爵定將該地方官嚴參治罪。至若直接十條之辦法。不但與中國向例不合。亦與貴國補約第一條不符。本爵實可以身當禍。斷不能受萬世之譏評。此本爵因貴大臣平日篤念和好。故以此披肝瀝膽之言相告。如貴大臣果念和好。諒本爵為貴大臣辦事年餘之苦心。遵守補約第一條。加以賠償辦理。則此中一切辦法。尚有

可以會同公議之處。惟貴大臣酌之。卽望照覆。為此照會。
恭親王等又奏。查湖廣總督官奉前議長江章程內。原有
徵收子口稅章程三條。日等前以此項三條。專論子稅。因
另行摘出。照會英國議。曾經奏明在案。茲據英國照覆。
以第一款分省發給執照一節。不便照依新議。其意顯指
蕪湖。大通。安慶三處。將來必欲求准通商。故不願分省辦
理。至於二三兩款。英國以為與約不符。並以為辯論反生
枝節。各等語。臣等公同商酌。各國在長江地方通商。其徵
收子稅之法。條約業已載明。尚可無庸另議。惟照覆內希
其在蕪湖等處下貨一層。查此一節。前因英國有照會前

來商辦。經臣等於九月間奏明。分咨沿江督撫確切查明。覆到再行裁辦。現已據曾國藩咨稱。安慶一口。雖許之亦必不常來。大通蕪湖二口。雖不許亦仍難禁止等語。臣等公同商酌此事。如於大局尚無妨礙。將來或不妨通融辦理。惟此時尚未議定。實不便任令洋船前往。臣等因又給予照會聲明。如在未准通商口岸下貨。仍行照約罰辦。其徵收子稅。仍照條約辦理。

御批
依議。

英國照覆

為照覆事。前准貴親王來文。將官中堂議定章程鈔錄閱

悉○查英商運貨任便在各口取給執照○係條約明文○如官
中堂所議○欲限英商凡在江蘇運貨者○必向江海關請給
執照○在湖廣運貨者○必向漢關請給執照○將英商奉准任
便請取之意○頗為減劑○英商在湖運貨○向來若在上海請
給執照○多費周折○因漢口各官○不肯遵約發照○是以該商
別無他法○今漢口已設海關○英商所買湖廣土貨○必在漢
口請給執照○該貨定運漢口下船○官中堂所欲○自為得計○
第該省未能平靜○難保漢口南北各路○無礙阻隔○英商運
貨○必到他口○方保無虞○本大臣不便依照官中堂新議○其
餘二款○一則與條約不符○二則辯論反致多生枝節○所稱

華民借用外商之名如何治罪。惟洋貨運入內地。英商華民。果願合同生理。何難設法。必至該貨皆屬外商之物。于口關萬難辨駁。尚欲留難。必有外商每稟受屈。懇請賠補。所議實為益少害多之舉。至所稱惟恐稅餉減少。又稱香油木植洋商不便販運等情。本大臣之見。官中堂無須多慮。蓋由內地關口抽釐等費較重。常有漏稅售私之弊。此等走私之人。無非時通逆匪。是稅餉過重。不但於

國課有虧。亦且於治亂之方。更有窒礙。茲香油木植等物。係外商所運者。必先向關取給執照。到口務將正半稅項均為完清。外商應納正半各稅。不可謂不重。若令百姓再為

加增。難免偷漏弊端等情。且外商領取執照。皆由各關所發。本為稅餉全納之據。外國商民運貨。貴與

貴國有益無損。總之長江既解前禁。各國商船。均得出入。漢口通商。外商運辦油木等貨。官中堂多方鼓勵。不惟

國課充盈。亦與該省土稅大有裨益也。為此照覆。

給英國照覆

為照覆事。所有長江內地稅餉章程。昨據貴大臣覆文。閱悉。惟湖北原議在湖廣運貨者。必在漢關請照一節。貴大臣以為該省尚未平靖。難保漢口南北各路。無賊阻隔。勢或如此。英商運貨。由到他口。方得無虞。視此不便依照官

中堂新議等語。本爵查兩湖地方。現已一律肅清。若英商在彼買賣貨物。就近在漢關請領執照。即在該關完納子稅。實為便商之舉。嗣後漢口各官。亦斷無不肯遵約發照之理。惟英商在湖廣地面置買土貨。若因運赴漢口下船。稍多周折。竟欲運至本埠通商口岸下船。則條約內既有議罰明文。本爵自不能不准各該關照約罰辦。至原議第二款。貴大臣以為與條約有所不符。本爵查原議第二款。內載凡有洋商將抵關之洋貨。或親身或令人自關運入內地云云。至應照邊關納稅過卡抽釐舊例辦理等語。查均係條約內應行之事。且與貴大臣上年九月內發給英

商告示內辦法相符。惟款內所稱海菜等中外皆有之品。停給稅單一節。既難分別辦理。應令該省另行嚴議。務將洋貨土貨分晰清楚。勿令牽混。至原議第三款。貴大臣以商辦輪反生枝節。本爵查原議第三款內載凡有洋商自通商各口。或親身。或派人入內地置土貨云云。至照舊例逢關納稅。遇卡抽釐等語。查與條約及貴大臣上年告示亦復相符。均應准其照辦。至恐華商冒請單照。誤將貨物入官一節。在官中堂係恐華商避重就輕。豫為杜絕流弊起見。於洋商實為有益無害。嗣後如有華商借用外商之名。應令該省將華商查明議罰。不與英商相涉。領事官自

必不致代為華商袒護。至香油木植等物。貴大臣以為係外商所運者。必先向關取給執照。到口務將正半稅項完清等語。既於

國課有益。而貨物為英商所運。自亦不致轉轉濟匪。應令該省仍行照舊發給執照。惟以上各款。原係總稅務司與官中堂酌議之件。現在仍應咨行官中堂督同總稅務司妥籌辦理。此外長江地方。應如何嚴防偷漏之處。應令總稅務司會同各該關。按照條約。相度機宜。設法辦理可也。

辦理通商大臣薛煥。江蘇巡撫李鴻章奏。九月十五日。崇厚所派委員航海抵滬。齎到蓋用。

御寶之漢文布國條約。臣等謹查外國間有總領事之職。而英法美俄四國條約。均無明文。未定其位居何等。惟通商稅則刊本。後附載咸豐八年前大學士桂良等給予英法美三國公使照會底案。內有總領事應與藩臬司同品之語。其時英使以伊國不設總領事。件照覆。英使未有答語。法使語亦含糊。今布國約內第四款。載有總領事名目。是為著在條約之始。該國換約公使列斐士。係以總領事兼理大臣事。論其本職。不應以平行照會呈遞總理衙門。體制所在。必應力爭。俾後永為定式。乃會劉飭令兼署江蘇布政使蘇松太道吳煦。給予列斐士照會。將該使原遞總理衙

門照會一件。隨文交還。令其改繕中陳呈送。然後由該署
藩司與之訂明換約。列斐士先不應允改繕。臣煥屬法國
繙譯官李梅。到切開導。乃據列斐士轉具申陳前來。吳煦
旋帶常勝軍前赴金陵勦賊。卸事。臣等復會劉委兼署江
蘇布政使署按察使劉郁膏。接辦換約事宜。十一月初四
日。劉郁膏與列斐士會晤。該使將德意志公會二十二國
各繕洋字條約一分。請劉郁膏閱看。據稱換約之時。均須
呈請查收。並請中國亦備漢文條約二十二本。與天津所
立條約原本同日互換。以便分交公會各國收領。俾得奉
行。劉郁膏當答以礙難照辦。仍具稟請示。經臣等飭該署

藩司告知列斐士。以上年所立布國條約。本包羅公會各國在內。約中有索綸。索摩。與布國前使臣艾林濟畫押鈐印。因其有押有印。所以謂之互換。且原約並未載有互換時另繕漢文洋字各二十二本。與公會各國分換明文。此時何能別有增添。即使各國欲將條約收執奉行。亦應由布國自行繕給。與中國無涉等語。於初七日會晤時正言駁斥。列斐士仍復強詞曉辯。漬漬不休。謂各國盼望條約甚急。總須通融照辦。免得再赴天津。劉帥亦復告以現已奉

旨。俯如該使所請。條約發至上海互換。天津即不帶此事。去亦無

蓋○該使隨遞照會○內稱公會各國○推伊國為首領○換約後
均須各送一本○始可交代○並非各要畫押之約○惟請照錄
二十二本○鈐用江蘇藩司印信○以便分送各國奉行等語○
該使呈遞總理衙門公文○業經遵飭改繕申陳格式○稍戢
驕妄之心○所請公會各國○同日換約一節○仍飭由劉邵青
給予照覆○告以該使所請○皆係布國與公會各國之事○中
國未便照辦○請速換條約○即訂日期○如果列強士俯首聽
命○辦結自不稽時○第該使既國於公會各國之追索○而洋
人性情又皆堅執○恐其再三懇請○似未便操之過嚴○激令
赴津○至各國洋字條約○尚恐固請收受○可否議明即交換

約衙門存案。不得請遞都門。以示羈縻而昭限制。理合請
旨遵行。

諭議政王軍機大臣等。薛煥。李鴻章奏。籌辦布路斯國換約事宜
一摺。外國總領事之職。應與藩臬同品。薛煥等以列強士本職
不應以平行照會呈遞總理衙門。設法剴切開導。今具改繕申
陳。外國與中朝往來交接禮數。國體攸關。薛煥等與該公使凡
處諭導。不激不隨。得以折服其心。改具申陳。永為定式。深堪嘉
尚。列強士將德意志公會二十二國各繕洋字條約一分。欲於
換約時均請查收。並請中國亦備漢文條約二十二本。與天津
所立條約原本同日互換。以便分交公會各國收領。經薛煥等

逐層剖駁。據理開導。該公使改請於原立條約互換之後。照錄分送。現仍飭由創部。給予照覆。並催速為換約。斟酌極為妥協。著薛煥。李鴻章。悉心籌商。相機辦理。如能令列強士俯首聽命。即著迅速辦結。以免別生枝節。如該公使再三懇請。未便操之過嚴。係屬實情。所請照錄條約二十二本。僅給用江蘇藩司印信之處。即著准其照辦。至各國呈遞洋字條約一層。如公使再行囑請收納。並著照薛煥。李鴻章所擬。與該公使議明。即交換約衙門存案。不得請遞都門。以示羈縻。而昭限制。

布路斯國照會

為照會事。照得前日面議換約一事。德意志公會內。除本

國外尚有二十二國。各有君主。推本國為首領。故與
貴國總立和約。本國欽差大臣去年在京所立和約。雖係一
人畫押。各國均經列名。現在互換所立畫押原本。自係正
辦。惟換約以後。公會各國均應照辦。所換和約。亦應各收
一本。以便遵行。本署大臣奉命前來之時。公會各國均有
國書。情願照辦。是以互換和約後。均須各送一本。始可交
代。茲請並非各要畫押之約。惟祈飭將和約照錄二十二
本。鈐用貴司印信。以便分送各國。奉行無滯。是所盼切。且
現值年底。總請貴司查照迅速施行。為此照會。

籌辨夷務始末卷之十一